

मार्निंग डोगरी न्यूज़ बुलेटिन, समें. **09-20** Hrs

Headlines

केन्द्रीय गृहमंत्री अमित शाह होरें नशीले पदार्थे दी तस्करी ते राष्ट्रीय सुरक्षा बारे नमीं दिल्ली च बैठक लागन। इस दरान जब्त कीते गेदे 44 ज्हार किलोग्राम नशीले पदार्थे इ निपटारा कीता जाग।

केन्द्रीय मंत्री डॉ. जितेन्द्र सिंह होरें आखेआ ऐ जे जम्मू च मौसम सरबन्धी क्षेत्रीय केन्द्र कायम कीता जाग।

उपमुख्यमंत्री सुरेन्द्र चौधरी होरें आखेआ जे सरकार विश्व स्तरीय खेड्ड ढांचा विकसित करने ते होनहार खडारिएं दे हुनर गी बेहतर करने लेई वचनबद्ध ऐ।

यातायात सरबन्धी मंत्री सतीश शर्मा होरें आखेआ जे जम्मू कश्मीर गी पानी सरबन्धी सैलसफा जलमार्ग परियोजना हासल होइयां न।

जलशक्ति मंत्री जावेद अहमद राणा होरें आखेआ जे जम्मू कश्मीर दा विकास ते लोकें दा कल्याण सरकार दी पैहली तरजीह ऐ।

<><><><><><>

Shah Drug Trafficking Conference

गृहमंत्री अमित शाह अज्ज नशीले पदार्थे दी तस्करी ते राष्ट्रीय सुरक्षा बारै नमीं दिल्ली च आयोजित इलाकाई सम्मेलन दी प्रधानता करडन। नारकोटिक्स कन्ट्रोल ब्यूरो – एनसीबी आसेआ आयोजित इस सम्मेलन च नशीले पदार्थे दी तस्करी दे राष्ट्रीय सुरक्षा उपपर पौने आहले प्रभाऽ गी लेइयै चर्चा कीती जाहग। सम्मेलन च उत्तर भारत दे 8 राज्यें ते केंद्र शासित प्रदेशों पर चेचा ध्यान दित्ता जाहग। कार्यक्रम दरान, श्री शाह होर नशीले पदार्थे गी खपाने सरबन्धी पंदरवाड़े दा शुभारंभ करडन। ओह एनसीबी दी भोपाल इकाई दे दफतर परिसर दा उद्घाटन करडन ते मुख्य भरै च मानस-2 हेल्पलाइन दी सुविधा गी बी शुरु करोआडन। नशीले पदार्थे गी खपाने सरबन्धी पंदरवाड़े दरान जब्त कीते गेदे 44 ज्हार किलोग्राम शा मते नशीले पदार्थे गी खपाया जाहग जेहदी अंतर्राष्ट्रीय बजारै च कीमत 2 ज्हार 411 करोड़ रुपें दी ऐ।

<><><><><><>

IMD Jammu(byte)

केन्द्रीय राज्य मंत्री डॉ. जितेन्द्र सिंह होरें जम्मू च मौसम सरबन्धी क्षेत्रीय केन्द्र कायम करने दी घोषणा कीती ऐ। एह्दे कन्नै खित्ते च मौसम सरबन्धी सेवाएं गी होर बेहतर करने च मदद श्होग। मौसम विभाग दे 150 ब'रे

पूरे होने दे सरबंधै च आयोजित कार्यशाला गी संबोधत करदे होई मंत्री होरें आखेआ जे इस नमें केन्द्र कन्नै खित्तै दी टकोहदी चुनौतिएं कन्नै निबड़ने च मदाद होग ते मौसम सरबंधी सेई ते स्टीक जानकारी उपलब्ध होग। प्रधानमंत्री नरेन्द्र मोदी होर 14 जनवरी गी इस सरबंधै च कार्यक्रम दी सदरत करगंन। केन्द्रीय मंत्री होरें मंत्री होरें भारतीय मौसम विभाग दी वैश्विक नेता दे तौर पर उभरने लेई सराहना कीती। उनें आखेआ जे X बैंड रडारें ते आधुनिक तकनीकें कन्नै लैस ते आपू कम्म करने आले मौसम सरबंधी केन्द्र मते महत्वै आले कार्यक्रम जियां श्री अमरनाथ यात्रा ते वैष्णो देवी जी दी यात्रा दरान श्रद्धालुएं गी स्टीक जानकारी हासल करोआंदे न। एह जतन सरकार दे मिशन मौसम कन्नै जुड़े दा ऐ जेहदा मकसद भारत गी हर मौसम लेई तैआर ते क्लाइमेट स्मार्ट बनाना ऐ तां जे विकास बाढ़े होई पर्यावरण ते आवो—हवा पर कोई माड़ा असर नेई पवै।

<><><><><><>

Vande Bharat Glimpses

केन्द्री रेल मंत्री अश्विणी वैष्णव होरें जम्मू—श्रीनगर रेल लाईन लेई खास तौर उप्पर तैयार कीती गेदी वंदे भारत रेलगड्डी दिआं किश झलकियां सोशल मीडिया दी इक पोस्ट राहें सांझी कीतीआं न। इस रेलगड्डी गी खास इस चाल्ली कन्नै डिजाइन कीता गेदा ऐ जे एह बड़े मते सर्द मौसमी हालात दा सामना बी बड़ी खरी चाल्ली कन्नै करी सकने च सक्षम ऐ। हाल च गै कीती गेदी इक घोषणा च मंत्री होरें इस गल्लै दी तसदीक कीती जे एह वंदे भारत रेलगड्डी सिफर कोला हेठ आहले तापमान च बी खरी चाल्ली कम्म करदी रौहग जेहदे कन्नै एहदे राहें जात्तरा सुरक्षित ते अरामदेह बनोग। जम्मू ते श्रीनगर बश्कार रेल संपर्क तौले गै इक हकीकत बनने आहला ऐ ते एहदे कन्नै खित्ते च संपर्क सुविधा च बाददे दे कन्नो—कन्नी जात्तरा च लग्गने आहला समें घट्ट होग ते जात्तरिएं ते खित्ते दी अर्थबवस्था, दौनें गी गै लाह हासल होग।

<><><><><><>

National Aerobic Gymnastics

उपमुख्यमंत्री सुरिंदर चौधरी होरें आखेआ ऐ जे सरकार जम्मू—कश्मीर च खेड्डें सरबंधी ढांचे दा दर्जा बधाने ते खड्ढारिएं दे हुनर गी होर नखारने आस्तै पूरी चाल्ली वचनें बज्झी दी ऐ। चौधरी होरें जम्मू दे मौलाना आजाद स्टेडियम च राष्ट्री ऐरोबिक जिमनास्टिक प्रतियोगिता 2024—25 दा उद्घाटन करदे होई एह गल्ल आखी। इस मौके पर मुख्यमंत्री हुंदे सलाहकार नासिर असलम वानी होर बी उत्थे मजूद हे। जम्मू—कश्मीर खेड्ड काउंसल आसेआ आयोजित इस प्रतियोगिता च 20 राज्यें ते केन्द्र शासत प्रदेशें थमां 500 शा मते खड्ढारी हिस्सा लै करदे न। इस मौके पर उपमुख्यमंत्री होरें नौजवानें दी उर्जा गी खेड्डें दी दिशा च लाने दे महत्वै पर लोऽ पाई ते आखेआ जे ई'यां करियै केई सारी समाजी समस्याएं दा मुकाबला कीता जाई सकदा ऐ। तोआई सलाहकार वानी होरें खेड्डें च जम्मू—कश्मीर दे हुनर पर लोऽ पाई ते एह विश्वास जताया ते मुकामी खड्ढारी,

राष्ट्री ते अंतर्राष्ट्री सतह दे मुकाबलें च अपना लोहा मनवाडन। एह प्रतियोगिता 10 थमां 13 जनवरी तगर चलोग।

<><><><><><>

Div Com Jammu DP Meeting

जम्मू दे डिवीजनल कमिशनर रमेश कुमार होरें खित्ते च दिव्यांग लोकें ते पच्छमी पाकिस्तान थमां आए दे रिफ्यूजिएं लेई माली मदाद सरबन्धी योजना दी अमल-आवरी दा कल इक बैठक दरान जायजा लैता। जम्मू सांबा ते कठुआ जिलें दे डिप्टी कमिशनरें इस बैठक च हिस्सा लैता ते अपने सरबन्धत जिलें च हाल दे समें दरान लाए गेदे कैपें ते होर दुए हीलें बारै जानकारी सांझी कीती। डिवीजनल कमिशनर होरें अधिकारिएं गी निर्देश दित्ते जे ओह लोकें तगर पुज्ज बनाने आहले कार्यक्रमें दरान हासल होए दे आवेदनं दी पूरी चाल्ली जांच करियै उनें'गी अगगे जमा करोआन तांजे योग्य लाभार्थिएं गी लाह हासल करोआया जाई सकै। उनें इब्बी आखेआ जे बकाया पेदे सब्बनं योग्य मामलें गी मंजूरी लेई इस म्हीने दे अखीरै तोहड़ी जमा करोआई दित्ता जाना लोड़चदा ऐ।

<><><><><><>

Inland Waterway Satish

टंतर देशीय जलमार्ग विकास कौंसल दी दूई बैठक असम दे काजीरंगा च लग्गी। इस बैठक च प्रदेश दे यातायात मंत्री सतीश शर्मा होरें बी हिस्सा लैता। इस दरान जहाजरानी ते जल मार्गें सरबन्धी मंत्रालय आस्सेआ जम्मू कश्मीर लेई परियोजनाएं दी घोषणा कीती गई। जेहूदे च जेहलम च शैहरी जल परिवहन क्रूज सैलसफा लेई जेट्टी ते चिनाब ते रावि नदी पर जलमार्ग सरबन्धी सैलसफा शामिल ऐ। बैठक दरान मंत्री होरें खित्ते दे पानी सरबन्धी सैलसफा दी समर्थ गी उजागर कीता ते भारतीय अंतरदेशीय जलमार्ग प्राधीकरण कन्नै सैहयोग दी बी अपील कीती तां जे डल, बुल्लर, मानसर ते सुरङ्सर झीलें च मकामी लोकें दी आओजाई लेई जेट्टिक्स गी विकसित कीता जाई सकै। मंत्री होरें जेहलम, चनाब ते रावि पर यात्री परिवहन लेई बी आग्रह कीता।

<><><><><><>

Javed Rana

जलशक्ति मंत्री जावेद अहमद राणा होरें कल भटिंडी दी केई सारी थाहरें दा दौरा लाया ते मकामी लोकें दी विकास सरबन्धी जरूरतें दा जायजा लैता। अपने दौरे दरान राणा होरें मकामी लोकें कन्नै गल्ल कीती, इस दरान लोकें पानी सप्लाई, शिड़क ते साफ सफाई सरबन्धी मामले गी पुट्टेआ। मंत्री होरें सब्बने मामलें दे हल दा भरोसा दोआया। उनें आखेआ जे जम्मू कश्मीर दे लोकें दा विकास ते उंदी भलाई बेह्तरी उमर अब्दुल्ला हुंदी अगुवाई आली सरकार दी पैहली प्राथमिकता ऐ।

<><><><><><>

Doda Cultural Club (byte)

इक महत्वपूर्ण पैहलकदमी तैहत डोडा दे जिला सूचना केन्द्र नै नमें कायम कीते गेदे कल्चरल क्लब डोडा लेई सदस्यता फार्म शुरु कीते न। जिला प्रशासनल दी अगुवाई तैहत इस पैहलकदमी दा मकसद खित्ते दी सगोसार सांस्कृतिक विरासत दा जश्न मनाने ते ओहदा संरक्षण करना बी ऐ ते एहदे राहें मुकामी कलाकारें गी अपना हुनर दस्सने दा इक बधिया मंच बी उपलब्ध होग। डोडा दे डिप्टी कमिशनर हरविंदर सिंह होरें इस सदस्यता अभियान दा उद्घाटन कीता। इस सरबंघै च स्हाड़े जिला संवाददाता कन्नै गल्ल करदे होई उनें आखेआ

एह कल्चरल क्लब, कला दे बक्ख-बक्ख रूपें कन्नै जुड़े दे कलाकारें गी इक मंच उपलब्ध करोआने दे कन्नो-कन्नी समुदायें गी बी सांस्कृतिक गतिविधिएं कन्नै जोड़ग ते एह डोडा च सांस्कृतिक सशक्तिकरण दी दिशा च पुट्टी गेदी इक महत्वपूर्ण गैह साबत होग।

<><><><><><>

Weather Highway

मौसम विभाग नै अज्ज बद्ददल धनोए रौहने ते जम्मू दे मैदानी इलाकें च हल्की बरखा पौने दी पेशगोई कीती ऐ। मौसम विभाग नै 12 थमां 14 जनवरी बश्कार मौसम आम तौर पर खुश्क बने रौहने दी संभावना जाहर कीती ऐ। यात्रिएं गी सलाह दित्ती गेई ऐ जे ओह राष्ट्रीय जरनैली शिड़कें पर दिनै गै सफर करन ते अपनी अपनी लैन च गै चलन। जम्मू श्रीनगर राष्ट्रीय जरनैली शिड़क पर दौनें भेठा दा गडिडएं दी आओजाई जारी ऐ, भारी बर्फबारी करी मुगल शिड़क अज्ज बी गडिडएं दी आओजाई लेई बंद ऐ।

<><><><><><>